

四庫全書

集部

欽定四庫全書

集部

明文海卷七至

詳校官編修臣錢樾

主事銜臣徐以坤覆勘

總校官庶吉士臣倉聖脉

校對官中書臣石鴻翥

謄錄貢生臣戈廷模

欽定四庫全書

明文海卷四

餘姚黃宗羲編

賦四

國事四

文淵閣賦

顧清

昔我文皇之統萬方也稽往古遵舊章攬衆維提要綱謂六典之分雖倣於周禮而百揆之總實自於唐虞或合而分或約而詳蓋不可無樞機之總疇咨之良也乃

眷斯顧禁垣之隅乃崇傑閣翼彼宸居錫文淵之嘉號
擢鑾坡之碩儒職論思於九重贊元化於中樞雖官曹
之未彰實名體之隱如此其大略也若乃其地則日華
之右丹鳳之東重門側啓複磴中通長廊後帶而龍矯
層城對起而繚虹非密勿之有闕蓋不得以闕乎其宮
其中則有石渠之秘金匱之藏殷周訓誥沫泗典常班
馬之所敘述賈董之所鋪張奎光璧耀照灼乎虹梁其
前則有玉階珉礎仰接俯延文杏敷錦碧芸連錢璫臺

植和鼎之卉銅池分並蒂之蓮承雨露之先及各獻巧
而呈妍其為制也邃密高閨沈深肅清黃扉豁其前敞
白間疎以通明案有朱墨庭無訟爭希夷乎紫宮逍遙
乎玉京邈風雨之何及時仙韶之遠聆乃有臯夔之輩
稷禹之倫大冠長劍鳴玉垂紳坐于兩楹敷帝猷而演
皇墳萬機倚以裁決庶績賴以經綸則有大官供帳天
府竒珍湛恩渥禮眷我儒紳至於睿思時凝事資訪逮
中貴傳宣東朝賜對日度晷而徐還步金扉而緩退其

或金根戾止玉輦幸臨略等級於堂陛咨失得於古今
每先過而陳善亦隨時而獻箴或都而俞或吁而咈言
皆可書動鮮有懲此則建閣以來累朝之盛節也嗚呼
漢開金馬賢俊雲蒸唐啓學館士誇登瀛徒取技于雕
蟲尚無闕于大經然猶耀簡策熙鴻名而况地兼乎木
天之重名並乎鳳池之榮酌元氣以運四時敷王言而
令庶正宜乎萬事於此理萬化于此成而陶冶乎其中
者又可闢於頌聲也於是拜手稽首敷陳其槩而系之

以歌歌曰五雲葱龍黃閣崇兮東壁流照光燁空兮維
帝伊佐志浹道同兮政於此成民物豐兮有隆自今垂
之無窮兮

河清賦有序 胡廣

永樂三年春正月癸卯高平王平陽王秦禹門津黃
河清朝臣歡動以為皇上聖德所致進表稱賀皇上
謙抑弗居未幾秦王暨山西守土之臣亦皆來奏見
者謂其清如碧玉洞鑑毫髮既而成五色經三旬有

二日漸復其舊稽之載籍黃河千年一清聖王之大瑞而五色者尤瑞之大者也恭惟皇上以至德之聖主敬之躬作配天地廣運神化瑞應之來適當其期臣叨陪侍從幸覩茲盛事宜有紀述以傳誦將來其辭曰

蓋聞洪河之水通銀潢而直下介箕斗之微茫繞崑崙而奔瀉欵潛行於地中忽渙發乎重野景如汲海之長虹勢若馳岡之迅馬驚湍騰逝悍波衝射

競千雷兮砰湧鬪萬鼉兮呼咤泥沙兮悠揚羌
晝夜兮不舍方其道積石厯龍門下砥柱逾孟津
出乎無際漂乎無垠臨萬頃兮漭豫折九曲兮沄
渾想夫浩浩湯湯堙塞未疏濟漯未從淮泗尚潴
匯四隩而為壑襄高陵而為汙暨九川兮滌源九
州兮既別拯蒼生於墊溺免斯世於魚鼈惟六府
之孔修兮賴胼胝之偉烈嗟形容於允翕兮諒一葦
之可越逮乎周道既東文武益遠清人庶其翹翔方

叔去而不返葛藟興綿綿之詠尼父有已矣之嘆
至若瓠子載決宣防既歌下淇園之綠篠沉美玉於
滄波恒汨汨兮混濁或沸齧兮盤渦曾未識其安流
胡能有於盈科誦逸詩兮俟清嘵人壽兮幾何信不
可以驟得必以待夫時之泰和爾乃禹門中闢磧石
琦礪洪濤不興一碧千里若人間兮天上渺余視兮
衍迤式同觀乎渭濱儼浮游於湘芷澄靚兮泓渟滉
瀀兮澗比鴨綠於漢江陋苔青於淮涘澹玻瓈兮洞

射凝雲母兮母淳風泠泠兮吹淥漪天晃朗兮映漣
泚粲飛鳥兮白鷗數遊鱗兮鱠鮪山倒黛兮染翠嵐
拖練兮成綺姱瀛灔兮按藍堪薦潔於明水朝陽升
兮澱彩盪夜月照兮鏡光洗紛揮霍兮五色乍紆徐
而忽駛寔元氣之融會而發榮光於此乃有黃耆
居河之湄睹奩遜而瑩澈為盛世之休徵爰以告
言聞於紫宸無小大而咸喜騰遐邇之歡聲維聖
人以在上致四海兮隆平霈仁恩兮汪洋洽寰宇

兮皆春萃諸福兮畢來沓衆瑞兮駢臻所以天父
儲其晶英地復闋其靈秀而千載之嘉應實有待
於聖明乃宗藩稱瑞寧謙抑而弗居秦晉呈祥遜膚
功為曷勝蓋功愈大而心愈小道彌高而德彌弘視
夫平成之績亘萬世而同稱者也猗歟聖皇允協神
禹稽河清之致祥翳寥寥兮前古撫金人而徘徊摩
銅狄而容與求有並美於今日亦漫漶而莫嘵泛星槎
以尋源聊逍遙兮銀渚俾玄冥兮先驅訪往跡於河

鼓雲冉冉兮斯征路迢迢兮遠舉憇鵲橋而孤吟睇層
霄而延佇瞻珠闕之崔巍聆羣仙兮夜語謂聖皇兮達
孝克繼述於太祖纘洪業兮率舊章靡毫髮兮與軌度
誠於穆而不已全睿智與文武天茂錫兮純祉浩穰穰
兮繁聚粵鴻荒兮芒芒河之清兮今始覩於以闡皇猷
之精微隆子孫無窮之祚彼漢唐之偶值又奚可以比
數艱元元而無知將以告夫下土羲和忽以啓駕宵曠
朧兮欲曙靈纘續兮既遙望余袂兮來下扶雲漢之昭

回挹九天之湛露披琅玕以自呈造金門而獻河清之賦於是為之歌曰河水兮清漣聿應期兮斯千年聖皇御極兮德配天於萬億秭兮福祿綿綿

放鳬賦

有序 周是修

洪武丙子春仲之月陛下憩乎東城之臺環羅俊彦諮詢古先既而有進水鳬百餘翼者毛色鮮華群匹和輯悠然興夫不忍之心俱放於凜觀其始則紛紛焉少則滅滅焉俄而並舉翔逝於是覽春光之舒遲

樂物性之得遂怡怡如也愉愉如也召奉詞臣周是
修賦之臣感夫君德之至仁及庶類敢不奉敷休命
再拜稽首賦曰

猗茫茫之堪輿兮胡萬類之紛敷維水禽之衆美兮盛
莫盛于鷺鳬雖群游之無算兮非定耦而弗居泛波濤
之浩渺兮樂滄洲之遼漫藉軟莎而安眠兮美經萍而
閑泳賴其趾而丹凝兮縞其襟而玉映性於物而不忮
兮恒恣情乎煙沙孰虞人之曾識兮羌潛羅而忽加愛

毛質之綺麗兮遙將獻乎皇家繫予皇之仁德兮當覽
春乎崇臺體陽和之生育兮澹冲融而舒懷適筠籠之
跪進兮絢晴光于文繡既彬彬而戢羽兮亦肅肅而並
味啓予皇之良心兮勅俱放乎金濛始依依而泊淺兮
漸翾翾而升高交迴翔而返顧兮若感恩而不捨徐翀
蜚乎雲霄兮遺餘音乎鉅野何皇心之惻怛兮由親親
而仁民由仁民而及物兮秩先後而有倫豈睿鑑於往
古兮寔誠中而形外思高下與洪纖兮期並育而不悖

唯好生而惡死兮人與物其同情何至德之昭明兮舉
一視而同仁觀夫若商郊之祝網兮暨中山之放驛於
禽獸猶有所不忍兮矧於人而違之尤異乎華陰之黃
雀兮終啣環而報施抑嘗聞江濱之白龜兮先伏篆而
朕祺善予皇之深慈兮澤旁沾乎微物念蒼蒼之生靈
兮曷非辜而有忽嗟羣鳬之何幸兮脫萬死於斯須遂
重登於遠廓兮從心性之所如歷漫漫之河濟兮依漠
漠之江湖刷羽儀而再整兮顧儻匹而相呼縱物性之

或昧兮將天理之可憑與作善而降祥兮同影響而足
徵匪麟趾之仁厚兮又烏致夫騶虞之蕃息願擴充乎
是心兮明刑政而不忒日渝敷於仁聞兮無一夫之不
獲薛曰爾鳬之生兮仁君之恩條離鼎俎兮翺于天門
東西無際兮南北無垠網羅交張兮矰繳相仍慎爾所
止兮全爾性靈毋或輕投兮暝渚寒汀庶永慰乎王心
兮想遐征而孔寧盍啣圖而獻禎兮遂韶鳳以來庭彰
予皇之至治兮發詠歌乎詞臣超間平於千載兮流無

窮之德馨

感宦籍賦

有序 湯顯祖

今上丁酉三月予以平昌令上四年計如錢塘盪舟長日篋中故有高士傳慨然尋覽之無存也童子故以宦林全籍進予覽其書官書名書地書號大若麟角細若牛毛晰矣備矣反覆循玩亦可以奮孤宦之沉心窺時賢之能事感而賦之曰

有平昌之令尹淹結課以孤羈偶猶夷而懊悵暫循求

於展披頗有仙班秘錄士品玄碑巾箱失檢記室忘携
既宦林之有籍豈童子之無知因而取御業已忘疲嘆
閱川而閱世何此書之可怡冠二京分列省之地界標
四季合匝歲之天時其地界也東綿遼拔西折涼窩北
隃代薊南極滇黎控中軸于長安部河山而四維皆百
戰之所取宜一日之可糜署都官於南北擬周漢之東
西南簡曹而少務北備宋而多儀外則邊遙其腹幹切
其支臺省於焉受使州郡於焉稱知有斗僻以孤鎮亦

犬牙而交岐甫一逕以紀絕或三會而扼竒下至一尉
一候險如三毫三危有兼有特孰正孰裨莫不禹迹陟
于周官堯封攝乎漢威猶恨缺紀官于采衛失請吏於
邊陲其天時也選則通急之殊其候推則例閏之謫其
奇秘館視三年之學內徵以四稔為規奏計俛優而或
殿報政當遄而或稽卧疴者往來於浹歲予寧者去往
以彌朞或遑將而往返或奄息之早遲第有聞其必鑄
鮮存亡而闕疑覘邸報之日積真會計而改為是故日

歷終歲以猶把宦籍逾時而輒揮在近者摘新而賞實
市遠者豫舊以醉欺非春秋也筆削聖而竊取非易也
先後天而奉時時之為義大矣惟名與器隨之嗟夫大
鈞寫物皇極鑄人物與無妄人生有真吾有身而易寵
世喪道而難貧是以羞其編戶榮乎縉紳然而布種詭
雜值侯纘綸幸者乃為公侯之子卿相之孫前書歟考
有階有勲後列環衛如官如恩托江河而猥大依日月
而常新不必學書學劍自然允武允文又若駙馬都尉

一體天人在既富其何費獲至貴而無勤次則納貲而
為郎亦以財而發身過此以往其勤可知矣清流之跡
奮以文辭則必沒身乎藻綴噪吻于吟呻寒暑侵而靡
覺骨肉怨而不辭至如羽林隸策倉門學醫吏人讀律
中書臨池立流理樂天文測璣莫不窮年渴晷立骨銷
肌彼殆胡為乎爾誠亦有所用之又其甚者作奸犯科
知無不為跋榮分侈迂平取奇皆欲爭毫釐于此籍之
上附咫尺于半部之餘外有乘間抵巇能畫能棋微言

解順說劍說詩日者狎客夜來秘師皆得遊大人以成
名指旁流而借貲下則緹騎惡子前魚弄兒一則如驅
如射一則如韋如脂無足比數何所覬睨然而物有所
至事不可知買功爵於攫金之後乞告身於枕袖之時
經營衣錦踐蹣跚綦絲在主爵而無斲咤剗劂以何遺第
云為之則是敢曰文不在茲嗟夫天下亦大矣仕人亦
夥矣有鳳凰之官則必有蟻虱之使有金玉之英則必
有糞土之士巨海葺龍蚌以鋪文太華總松榛而統翠

散之人有十等合之天無二日天其平也不平人則不一也而不平謂何有一有多有終身於帝所有絕望於廊阿有十年而不調有一月而累加有微敬而輒振有一蹶而永蹉有弱冠而崢嶸有白首而婆娑有受萬金而無譏有拾片羽而為瑕有擁璫于華羨有投牒于荒厓有提韁而擬方伯有守郡而無建牙有贍僮客而鳴豫有絕父母而勞歌有長孫曾而襲珪有鬻子女而還家有上壽而賜尊有自經于幽遐麗風者衍言笑而

加翼絕津者罄號咷而靡槎得時者隨俯仰而皆妙失
志者任語嘿以無佳徒使墨守者視此書而失據捷鬪
者指是刻以嚴誇智愚勇怯於斯乎盡銳貧富侈嗇于
是乎交賒細則鑽如蚊蚋大則據若蛟鼈緩則穆如頃
筭急則慘若鉛邪親屬之榮悴以此人身之軒輊匪他
何必者舊傳而特筆人物志以編摩第登名於仕版若
陟嶽以盈科有規有矩如琢如磨諒有朝其必市想無
臣而不波乃有揚休山立邃戚駘駝姓名舛詭爵地參

差鸞視虫其一粒豹覺龜以隨窠苟有懷而未瞑總奔
命於旁羅是故謁選則咳成雷雨議汰則委若泥沙地
貴則喚之以雲錦命賤則等之以風花至消詳于品列
益撫卷而增嗟名理疇而贊售功勤埒而溢夸等竒節
而抑真並文林而采華然則茲籍也蓋有朱紫異質淄
泥同和者矣迨其甚也且有人焉巧若窮奇昧若渾敦
名可以冠楚杌貌足以鑄神奸物論之所必去茲籍之
所獨存方災木而未已或聞季而彌尊亦有行若處子

智若者舊望足以壓折非是才足以獻替可否謂周行其必先視百爾而豈後比索名于右方復展轉而烏有或置無人之境或寄冗從之數冷之所以必灰瘴之惟恐不爻彼拙效其常然豈削籍之所朽徒使頑弱之人覽茲籍也耀其貴如得如驚贍其賤如失如玷懲死灰之不然慕積薪之所占名已沒其焉如貴及生而可艷損亢壯以和顏美幽憂而委念然則茲籍也能使人采色飛舉道心沉亂可觸手而偶觀難淹神而久玩忽掩

卷而固然吾亦多言之為幻矣

秋夜繩牀賦

湯顯祖

嗟予肱之三折兮方鬢亂之歲月哉哉病骨固難支兮
又逢途之九折當春陽之新麗兮蘭茁其芽不使吐辭
作醴兮呵筆出花而層冰飛霰兮敗其穎秀身藉荼蓼
兮材輸節芳憶昔十一讀易兮七年鼎革五經句讀初
離兮左國文辭未析波平則圈雞牧豕兮塵起則萍漂
絮翻於是四民失據兮俯仰惟艱冉冉歲華兮三旬夢

魂妻歿子殤兮聊餉口於村童蜩螗蛙蛤聲中兮舌敝
耳聾庚午水變兮開闢未際爾乃穿竄蕭寺兮猶然戀
茲疣贊之未潰晝則山童四五兮授以三字夜則寂守
繩牀兮共茲因山之味食則三投麥菽之饘粥兮已煮之碗

飯當暑熱時必蒸過一宿後而

後投之為粥食者毫無米氣

營營青蠅又玷其紅白

佐以瘠地之苦蔬兮反漬以衰殘之心血居則分僧寮
之咫尺兮乾蠅掛壁南山八月蒼葭兮逗引風霜東海
三脊白茅兮疎漏星日野蔓山葛驕而入室兮蕨筍蘆

芽戢戢而爭其餘隙蚍蜉遂爭國於檀槐兮蛙鼃窺天
於坎井一儿一榻兮曙而復暝敝惟落盡梅花兮月色
融然故衾冰裂水田兮幽渚鷗眠每欲避愁於華胥兮
恨春宵之猶永何夏夜之易明兮似獨迢迢於孤枕俄
而未明告謝又值凜秋寸寸衰草處處酸眸山闊闊而
欲寐兮溪潺潺而捫喉風鳴金鉄兮盡是商聲雲垂惟
幕兮似悼窮愁萬感不召而自至兮都歸展轉之更籌
因思夫人自立於宇宙兮君與親之恩罔極非致主之

伊周兮則安邊之衛霍雖束手而談王霸兮亦何忍視
斯時之民瘼苟時不吾與兮遂藏經綸於把握即若予
之廢人兮豈無翰墨之堪託乃悲歎窮廬兮負千鈞之
家學洛閩姚江門牆徧宇宙兮歐陽傳經八代嗟哉尸
居餘氣兮免園之耳目如芥是以鯀魚之目睫長炯炯
兮萬山之淒苦畢集試敷陳其百一兮已藤葛纏乎酸
筆初聞澌澌於風竹兮勢漸逼於奔濤波臣忽溝為絕
島兮冷炊火於昏朝廷天夢難醒兮獸塘突而禽號斯山

雨之狀也濕暑收潤兮秋氣到襟初則舞幡幢而拂佛
火兮故紙愁吟繼而星河搖而欲落其或落葉敲窓兮
魂返雲山之夢宿鳥墜枝兮悲興三匝之音斯山風之
狀也着樹凝雪兮穿沙湧潮憶昔四載漁澄兮依依故
交今向空林兮分我半巢但怪夫近軒楹而帶秋兮入
筆墨而含騷斯又山雲之狀也山境逢秋兮意緒涼荒
茅苦竹之間兮贈以清光分清陰於禽藪兮落涼冷於
魚鄉於是茅簷遙影兮葦壁蒼蒼松竹書衾兮癯鶴巢

霜斯又山月之狀也若夫寒蟬之吟也夏蟲忽值涼秋兮翳槁葉而寄絲聲白雲清露生涯兮花爛花殘豈異其鳴若為代寫心寒兮風中嫋嫋領彼餘清秋蛩之怨也當夫寒澗捫舌兮露草喫含爰有微物兮時訴酸咽既不藉食於夷跖兮亦何恨何支干攬倦羽之眠鳥兮警斷腸之定猿嗟予之涼行無伴兮何怪汝之多言至於西月飛梁兮夜影向晨透喧聲於空境兮諸蠶蘇魂如雲冉冉兮不住蒼狗之羣如風渡水兮豈滯藻川之

文硯爾一聲兮驚破耳根擬乘桴於二楞之海兮曙樓
起東方之白雲非鐘聲之叩曉乎山無雲帶兮樹斂商
聲忽起悲音於遠塢兮互報霜清一到衰殘之耳兮感
生淒斷之更憶自破鏡離鸞兮十載衣單悼故襦之淚
痕重叠兮魂絕千山非砧響之搗夜乎若夫循籬瘦菊
兮寒映曳汀蓉影堆墻敗葉兮焰分綴草踈螢鳥驚暗
月兮斷續雁離孤唳鼯嘯空梁兮依稀猿斷三聲猛虎
怒嘯兮不寒而慄苦鳥訴衷兮酸欲墮城佛影沉沉兮

琉璃明滅梵貝寥寥兮寒竿卒折騷魂召而不反兮雲
未斂而慘黯天亦老而溟漠雖然觀夫世之紅塵機巧
兮爭枯菀而著足譬彼海市浮山兮儼輝光之眩目走
炎趨熱兮競自焚以待燼吁凍呵霜兮易暄涼於片瞬
自惟即無轍軒於盛年兮不過把玩於俄頃究亦何所
得兮難繫夫崦嵫之夕景憶前賢之流風兮山高而水
長思分雲而把茅兮高堂之大椿永芳置琴書之楚楚
兮摘培上之薇芳挿萬卷之森羅兮波及乎性海之汪

洋觴詠於倍日之年兮亦有雲水之徜徉山中之清風
習習兮乃有味於繩牀亂曰山淨林空水清澈兮迥出
雲霄無塵滓兮別開門戶亦云美兮時不我與託跡此
兮名賢風韻可翹企兮養老長幼翦蓬蒿兮雲水遨遊
同鳶履兮苾荔蒼翠映蘭芷兮柏子清香妙沉水兮塵
世浮華猶糠粃兮

明文海卷四

欽定四庫全書

明文海卷五

餘姚黃宗羲編

賦五

國事五

籌邊賦

沈鍊

粵有五陵遊客懷鳳翼之書挾魚腸之劍南步荆吳北
登燕甸策馬居庸之闕方輶上谷之塹捧心如星營目
若電於是造塞上老翁而問焉曰伊昔高祖肇造區宇

妥歡歸順縱其北處暨我文皇開拓土疆若六轡之馭
馬孰違余之控縱廻若已已之變則起侵凌之漸王振
貪而中搖喜寧狡而外眩震驚土木之川彈壓清風之
店然而鄖王監國太傅提兵望翠華其既遠飛碼石以
長征三十里外動覺無人五十年來不能窺漢比豈非
今人之著聞往事之昭爛者哉弘治乙丑魚臺不守遊
兵六十連臂而剖草塚縱橫土棚不整誰生厲墻至今
為梗由此言之敵人之勢不殊也昔何其衰而今何其

盛中國之人不削也昔何雄強而今何退聽願大人熟慮而籌其宜劇談而究其竟僕將委心而從命矣老人越席而拜撫膺而嘆曰嗟乎嗟乎廼者學士束筆笑涉兵鈐縉紳緘口不言邊患何哉容身之趣卑而憂國之心誕也不知天之生人一體同氣性命之中萬物皆備是以黎庶有並生之仁宇宙皆當為之事乾坤等上下之爻日月煥君臣之義普天均照有外有中率土胥歸無巨無細主憂臣辱上安下利一家則父子之心常齊

同舟則吳越之人共濟故利有所不得獨專害有所不得獨避唐虞師師九官交箴成周穆穆三后協心伯益升而夏烈傳說命而商霖一夫不獲則伊尹以為已罪六羽初獻則宣父之書至今故告老而請討陳恒之逆作經而數稱小白之功相魯而重楊夾谷之會獲麟而嘆吾道之窮是以為生民立命為天地立極合中國于一人通萬古於一息古之君子曷嘗以閨閣之奉自崇血肉之軀結策嗟忠孝之道衰兮人懷私而自異視君

父若途之人兮曾不滿夫一睇榮寵汝其何為兮蔑秋
毫以介意想九重之皇皇兮念中夜而不寐彼藐藐方
自營兮曰非余之所致冀上帝之察九土兮惟懷忠蓋
其有幾人嗟匹夫猶戀主兮況纓紱之在身幸高位之
難得兮日汲汲以謀貲感夫人之竭誠兮曾不顧百姓
之流離有司斂財以結納兮三軍救死而不暇自官方
之多錯兮雖嬰孺猶挾詐朝結納之有門兮夕遷轉之
如響恒人不以為恥兮訴親交而欣賞將無心而血戰

兮士無力而効死要中國之不適謀兮何外番之能威
客且無論公卿之議而談將帥之略無先廟廊之言而
定邊陲之畫可乎老人曰事有本源物有紀綱不知先
人何以安民不有內治何以外攘周公思而白狼貢虞
舜讓而河鳳翔蕭何內調而淮陰之謀展魏相中協而
充國之計揚亦有至難知人之哲齊威檻管仲而未諳
五伯之材桓溫遇王猛而猶憶三秦之傑倘忠亮之不
行雖岩谷之影絕彼朝遊而夕叩顧辭卑而禮厚若夫

人之高翔等浮榮其若臭弓旌招之不來况肯穴其圭
竇椒胡有窮黃河猶漏重益蹇連空增虛謬憑所為則
恩惠不由其門從所言則功名反出其右故千金而未
罄衷情一言而輒生戮辱得遇而組綬蟬鳴失勢而形
容踰跼寧使生靈被塗炭之苦無寧使門下隔當衢之
軸寧使朝廷負四海之憂無寧使寒士享一朝之祿此
其病已成而為慮已熟矣雖有將帥之材邊陲之計何
由而矚哉客曰鹽鐵論興文學議公卿之貴輪輿說成

王成屈野人之對子之言誠明矣然則今之為公卿者宜何如老人曰主上明聖承天恭命道極精微德循中正深維社稷敬戒時行膳茲小民憂心日兢警爾三公諭爾百辟禁中揮洒雲漢昭回仗下傳宣雷霆赫奕誠濬發於九重迨風行於八極曰朕夜分而不寐展中心之規畫俾小大之盡言破遠人於絕域孰高居而端拱寔睠戀於幽側臣子而欺君父日視昭其何益天語琅琅雲容厯厯萬姓攢心千官變色小臣聞之涕淚潛滴

有君如此誰忍不力於是誅怙慝之臣開僨軍之赦構
大將之材較團營之射輸穀粟而東西選良材而日夜
表率神明之風躬行玄默之化恩不報而常施罪已刑
而猶籍體堯舜之至仁在伯鯀其猶借暨九載而方殛
詎一朝而獲罷望庶幾其改之何蝼蟻之足跨欲招俊
傑且安韓信之邪志重循良豈昧王成之詐由此言之
陛下不負人而人自負于陛下凡今公卿保傅之臣
率彼文武臺郎之士同湊厥心各勵其志夙夜孜孜有

死無二苟有利于社稷吾何愛于髮膚苟有傷于百姓
吾何畏于權貴聞一善則同聲而推見一惡則并力而
擊扶持國是有如日月之明摘發羣邪不讓秋毫之析
賢材進而流俗退公道行而私交息如此者固陛下之所側席而思而百姓之所延頸而企者也以父事君之所不悅以家事國何所不決竊有一言不踰四字科道者耳目之官吏兵者股肱之寄耳目達而羣枉昭股肱宣而百為治然後虎豹奔命而入林狐狸望風而投穴

貿遷轉則鑽刺而無門售擠排則窺伺而無隙故許歷
一言而破秦馮驩三計而安薛包胥慟哭以成名魯連
匹夫而仗節豈有五等之風行而三軍之政闕哉將帥
承指授而成功士卒感溫醇而激烈若是而邊陲之地
不守烽烟之警不息僕則受妄言之殛不知者謂老生
之常談其知者以為聖人不能易且夫逐世議而衰興
隨流風而披靡此其駁乎不足議已固有豪傑之才高
明之調仰屋梁而竊嘆展往籍而悲嘯人士依其令聲

海內望其芳躅然後徘徊猶豫長慮却顧欲翹翔而斂
翼幾高舉而促步蓋默成以潛處不顯著其名譽諒深
衷之有為但恐年歲之欲去棄欲調則軫為之回病欲
療則藥為之劑事在苒苒其日生法轉展其滋弊此老人之
所拭目以流盼傷心而雪涕者也客曰本源足而後枝
葉生紀綱正而後法令行是則然矣迺若張良著軍令
別為三教任宏校兵律分為四種豈可仁義無節制恩
威而無系統者與角勇力則先技藝闡智勇則尚謀猷

與天則陰陽順與地則險阻脩故風后撰握機之文太
公垂金匱之鉤李靖演六花之陣趙德紓九宮之籌此
雖近而莫廢又何深之不求老人曰適已言之詳矣世
未嘗無技藝而不聞好技藝之士世未嘗無謀猷而不
聞任謀猷之將迨孝文之拊髀各興心而慕尚安得至
公之言推擇有道之士築壇而重其名授鉞而隆其意
有闕聞外之言悉聽將軍之制受命而行仰天而誓既
已許國有不竭忠何異為賊然後合豪賢以詢謀集參

伍以宣令既三令而五申復周言而密訂將有欺于三
軍軍有欺於百姓父不得而赦子愚不得以讓聖賞不
負心誅不奉命削成廉礪何殊百煉之剛照破寒邪有
若干年之鏡豺狼震疊甲帳星稀鳥鵠低回轅門風靜
威行秋霜惠流春陽保之如子視之如傷中心覲之念
投醪猶其外飾肝腸是布知挾纊幾於色莊君祿無窮
請謝苞苴之客臣心可鑒那愁萋斐之郎惟愛人之一
德無營已之多方欲得人之死力詎借生全之厚欲破

敵之精微焉辭訓諭之詳法無時而不練令無往而不
張仁至而後智全精專而後巧出惟神明之有機詎戰
攻之無術往軒轅之殷憂感玄女之答述發揮至一之
源推明變化之律從五人之初布積伍伍而漸舒象常
山之蛇勢結首尾而同樞由教明而方定遂心合而志
符起一元之精練極億兆而不殊云此道之非遠順自
然以為居雖萬勝之無折亦一戰而有餘先聖運之而
出奇後賢因之而作遁老氏演生三之文廣成操得一

之論計然托越嶠而智恢孫武藉吳宮而謀奮鬼谷挾
捭闔而詭詭黃公持牝雌而悶悶雖孔門焉不學蓋猶
存夫冉求之間惟三代之盡善未嘗廢夫車戰駕四牡
之彭彭被介甲之雕煥肅先偏以後伍鬱魚麗而鵠鶴
閱衛青之武剛訊馬隆之鹿角載輜重以不虞嚴周營
而難薄相風雨而進退步原隰而前却隨險易而能驅
稱大小而斟酌昔李賢之議戎贊斯藝之詳曲既揮霍
其箭鋒又憑陵其馬足往彼勢之遠近由我軍之行止

藏火器之煌煌鑄神鎗之齒齒縱以九龍之烟發以百
鳥之矢上有無極之將軍下有纏錦之細子游兵翼出
若九天之飛下伏兵漸發若九地之突起本中堅之純
一密部伍之經紀納謀士之如雲驅勝兵之若水渾渾
淪淪誰知八陣之門繩繩縱縱莫測五行之理人人為
伍伍則同行馬則同隊車則同箱步兵翕散各各為方
車馬步以為三經竒正伏以為三緯星宿陰陽明天之
時山水剛柔察地之軌望遠知微有間諜之所未詳隨

機應變有圖書之所未紀此則懸於一時之權運於一心之妙參神氣之玄同齊臂指之相掉發之為機權之宜存之為仁義之要知二物之極明而后明先王之至道客曰此足明戰爭之畧而未極夫攻守之常縱變化之膠葛雖千言其靡央騁辨博則枉靡乎丘索競文詞則徒切夫宮商子何不於其制禦之恒理姑畧言其大綱老人曰善哉斯言僕若卷舌復將誰宣乃今積弊相尋法令不一究其深患則在於入衆而轉輸調軍而更

出公有養軍之費而軍無受恩之實將有調兵之煩而
兵無破敵之質所以致軍與民之交害而攻與守之兩
失何為轉輸之弊飛輓千里憔悴萬夫出入之際吏緣
為租三十其鍾僅致一石樵蘇後爨士有飢色迨臨邊
而給散有無方之虧爛屯田千粒歲破幾十軍士衣糧
日銷過半稽勾則案驗難徵告訐則株連莫算又有公
罰私科前催後呵脩邊晨起防邊夜過敵何時了腹何
時飽居為累囚行為餓莩憂苦日多歡娛日少借問邊

氓幾人能老何為更調之弊生長東塢驅馳西土一作
軍夫長年愁苦恨別妻孥生離父母敵在何方戰在何
所元日出征晦日歸處他鄉之亂我則何與暨其涉渡
關河經過州縣望門投止竊席休倦婉轉則主者不容
憑陵則閭閻積怨官軍一過雞犬皆愁客糧支而恨少
馬草散而還偷挾少婦而逼辱持梁肉而強留信地將
臨中心愁懼筋力已疲誰不猶豫為今之計莫若及今
春融墾田勸農緣邊千里荒土無窮聽其開植任其播

春能興千頃之田者授以千夫之將能均一境之土者
令當一面之衝小大參差遠近齊同效公瑾之省餽法
李絳之置營規晁錯之募民塞下模重華之列徼西東
民不改籍軍不受糧公不起稅私不別倉器甲自造車
馬自將內連堡落外接邊疆漸穿溝洫增設杠梁且耕
且練行戰行防鄉鄰即其什伍耒耜即其劍創強敵者
即其私門之患邊城者即其私室之牆家有給足人有
樂康妻孥連袂親戚合堂吹笙彈瑟烹牛炮羊貲產易

戀恩義難忘况有明訓忠孝結腸不同心堵絕欲去此
何方人心既籍經制遂密千人合堡十堡連柵夾以偃
月之垣伏以井欄之宅聳落不疎聲援相值魚出遊而
並肩鳥將飛而比翼高山之下隱以絕壑並土之傍多
其閭域棧礮石之頻戲培松榆而漸植既謹屬其風火
又多設其險阨一夫當關萬夫莫敵土著成兵屯田成
積民無怨嗟官無譴責此謂以中國而守中國乃有附
近之藩舊為羈縻之屬欲精心而撫馭令羈勒之相逐

棄其往日之非示以將來之福譬蒐人之養鷹飲食之而馴熟飽不致其飛揚飢不煩其蹠躅亦選擇其狡獪頗牢籠其機曲密調遣之差池善詰言之翻覆就我術而不知窺彼奸其如燭散和好之日銷結怨讐而還讒故陳湯驅烏孫以滅郅支班超假北部以陵西域奉世諭諸國以攻莎車耿弇連鄯善以摧河北其有望風納款叩闕請和便煩省諭鬱絕未過必欲貢汝所有求汝所欲不用名馬不煩寶玉但徙定遠於樓蘭逐驃姚於

身毒臨徼塞而稱戈向闢門而橫搠我則計首馘而給
繒因功勞而致祿彼遠來而疾速我近出而遲迴彼狃
勝而小翫我決戰而大摧下馬卸鞍臨風鼓瑟輕車突
圍反懾攻壁金鼓雜聲旌旗亂色機以因生權由變得
氣勢漸移風聲暗易種類凋零誰為我敵由是天子建
中和之極聖人垂參贊之功文章充蔚禮樂大同聲教
訖於四海仁恩洽于九重越裳之白雉盡入肅慎之楳
矢方窮太史作王會之圖史氏陳吉日之風極霜露之所

隊放舟車之所通頌率土之浩蕩配麗天之穹崇太平
之業盛王者之化隆遊神華胥訪道崆峒抱元守一體
妙思冲與二儀而並壽又何有乎喬松客乃援琴而歌
曰涉塞上兮寒霜河水流兮中央言連蹉兮有極道杳
渺兮無方鴻雁飛兮以北鳳凰鳴兮淒惻睞日月兮行
邁為夫君兮太息老人從而和之曰時不來兮安憂聊
偃蹇兮河洲縱心志兮恬愉橫八極兮遨遊與鸞鶴兮
為羣等富貴兮浮雲道之行兮有命寧惆悵兮夫君於

是相與陟眺高山盱衡積雪酌酒裴徊既醉而別

平陽武賦 李承箕

搜姦民以誅之兮在昔有言昊天曰嘻兮揚武亦民惡
固稔而改轍兮含羞惡其非人黃潦涵于日旬兮功清
流分品物于秋露之成兮樂風日之與春佳種視同于
荑稗兮妨膏腴之如雲門墾坦道兮羌揖讓以佳賓肆
鉏斧之後時兮凝冠裳而荆榛飛之以鸞凰兮瑞之以
麒麟奈鵠鷗之夜鳴兮與豺狼之必仁性既染而膠固

兮擗滌靡及於白新瀾漫漫而東去兮泡沫隨以紛紛
昊天嗟吁兮慈敗子其何親母肆原以烈焰兮石以收
珉母耀武以陵忽兮雲鳥奚恃于開陳除斗帳之蚊蚋
兮拂几上之埃塵肺孰總而令誰一兮八州都督之雲
孫選鋒銳以虓將兮曰惟倪君大懼恩怨以昧昧兮訊
遠符于閭隣先之以藩省兮繼之以獻臣汝罪不容于
死兮獄詞據其本真繙游對目以遊姬兮曾何云云曰
遺情豈珍重于一瞥兮城中綠鬢而紅唇奕彼諸美兮

月既圓而及辰綺憲高閣兮蘭麝交薰妖歌艷舞兮樂
與子勻執行道以咸詰兮汝曾我聞路東西而南北兮
汝衣襟之非村抑貿販而來往兮抑伺邇而遊巡信騰
口以喧喧兮我何懼而奚嗔情不畏天人兮以螢燭而
凌晨闋棄宗祀兮曾惜於犬彘之身豈所傳之皆皆兮
羌澆變于既淳唯虓將之清淨兮張三面猶酸辛腰金
照胄兮三品將門悠世德以停蓄兮咸以烈而心溫罪
人斯百兮權度而先存曰違天以黷武兮計一時之勲

胡勉強以徇物兮稱大將軍

昇平賦

邱雲霄

夫自桃谷迷津遺恨武陵漁父芝山冤道流聲商洛基
翁遂令後世耽情肥遯薦志陸沉者莫不屬心高潔景
止芳馨焉然予嘗讀高士傳及桃花源記未嘗不慨然
罷卷慨其所遭方羸氏之亂天紀顧民生之如露晞號
嚴迅震法密凝脂當是時也搖手犯禁重足懷疑是故
知者逃名達人遠跡奮鴻舉而甘豕遊避危機而謝繒

及恐恐焉入山不深投林不密則其所以種朱桃啖青芝放身長往與世相遺者乃其不得已也而又何樂乎
締觀其歌夷考其事則慨唐虞之世遠托深谷之逶迤懷富貴之憂大甘芝草以療飢率妻孥于絕境樂草木之無知世秦服而昧漢况魏晉之推移則其情可悲而志固可識也肆今吾人忘日月以優游順陰陽而消息夏葛冬裘倦眠飢食羸稚相保上下各適儻邇豆翕兄弟靜琴御衍家室時賓四隣或來三益俯仰寰區讐論

今昔感鬼絲于女蘿固纏綿而交結壘城郭以憇幽林
登壠丘而掃紅葉死徙同鄉桑麻連業樂彼逍遙順其
生滅夫所以獲此者豈無自哉當我皇明啓運萬姓攸
躋列聖建中四方來極文承武開漸仁摩義所以垂今
百有八十餘年重熙累洽林鳳郊麒麟烽寒斥堠兵寢潢
池民稼而饔婦桑而衣是以天下皞皞四海祁祁爰擊
壤于康衢忘鼓腹于帝力而曾莫知其故也昔者武成
奏功歸馬牛而士女來綏宣王復古歌鴻雁而流離安

宅夫當傾否亨屯之餘乃遂其室家胥慶之願則吾人于久安長治之世而保其休養生息之樂者其相去亦已遠矣况于草昧而引去者邪使後世有桃源翁芝山老未必不自嘆惋而追賞吾人之遭幸也誕今享有諸樂咸不自知因感而賦昇平焉

明文海卷五

欽定四庫全書

明文海卷六

餘姚黃宗羲編

賦六

時令一

續春思賦

徐媛

於是春也游乎江涘感條風之扇物悵吹萬之不齊喟然興思援筆為賦昔龍門年少玉藻掞天鬱彼羈懷綴茲高響既析字而成珠亦汎聲而當珮後有作者吾無

間然至於繡閣雙鬟幽懷萬緒經春濺淚理非一端得無有留欲吐之章俟後來之秀者乎予本恨人驚魂無定載成斯製廣寫幽憂可謂千古傷心一時遙集者矣其詞曰

遡長流而進櫂駕日彩以浮梁雲濛濛兮輕曳烟靄靄兮微揚維時青帝司晨女夷節鼓鶯竊吳歛蝶翻趙舞碎銀沼之萍花散玉樓之冰柱氣暖平原香繁別浦欲流月姊之輝未值風姨之怒冶遊則拾翠採珠寄樂則

沈宮振羽嗟哀樂之致懸匪一理之可研類銜傷於暮
序或撫心於綺年境何觸而非恨淚何人而不泉若闋
外之殊悰羌難得而備宣也至如金屏椒壁綉栱瓊礪
若有人兮閉其中步徒倚兮私自惜簾捲水精枕留琥
珀風斜轉而吹奩月孤生而照隙艷朱謝脣輕黃罷額
池桃空紫石苔長碧羊車過而塵杳鳳吹繁而院隔何
游絲之似繞更落花之如擲舞驚鴻其已緬慰真珠其
奚益乃天達之鳳子適月竈之烏孫三月雪飛萬里晝

昏星懸漢影笳折邊魂駭驚沙之無斷傷芳草之盡髡
俗侏僂其難接色蕪絕而不言登別館而凍雲集眺荒
野而苦霧屯魑鄉侍寢羶酪當殮臆中鳩鵠之觀夢裏
蒼龍之門睇故國兮無日知天子兮少恩亦有少小容
華生來婉弱筭非蔡而羣迷腰未楚而先約芳菲菲而
入宮黨訛訛其謠詠君意不自堅君恩俄已落修成之
肉可糜新人之臭幾斲鬼帝誰叩皇孫欲啄勢甚撓椎
危踰巢幕恒撫節而骨銷轉當春而神索別有便娟銅

雀妓漳水東來寫姿媚俱照渚而成蓮各臨風而拂翠
宵寐玉喉翩翻繡袂旋娟為之氣奪洛珎因之色墜值
君王之未疲泊賓筵之半醉態轉裾廻魂挑眼刺雕閣
黛浮瑣臺香膩守宮之血未乾辟寒之金爭餉痛尊酒
其寂寞空西陵之歌吹駘蕩青陽悽焉雪涕況乃初歸
瑤鏡慣盡青眉忽河闕其遐別邈烟路而安之琅玕結
意勻藥贈離舉邯鄲之翠袖泛蘭陵之淺卮君啼妾拭
妾臂君持孤舟尚艤短邃乍吹草縈情而磴礙柳帶恨

而橋垂寫素懷於石闕申丹欵於廬房渭水波兮代咽
越鳥啼兮助悲故歡亮已矣良晤終何期及夫秦生赴
掾細君未從將千里而同子何二豎之留儂一則故廬
善病一則天涯浪蹤鎔茶夕冷杵藥晨春錦衾橫而爐
氣歇華燈燦而樓影重憐琴心而別鶴妬鏡背之蟠龍
夢遙尋而難寄書促往而忘封對此閨闥鳩語灼灼花
卉何嘗不抽簪覺短約帶憎鬆予美亡此誰適為容是以
新光新氣新景新愁固千悲而一族亦異感而同憂

莫不寄微情於湘女結幽恨於靈修豈與夫康娛漂瓊流連桂舟艷曲平原之第巧笈如臯之遊夜以繼日忽悠悠者哉重曰菉蘋既已廣紅蘭亦已長浩空江兮無人邈予心兮愴悅復颺鳩兮先鳴撫歲華兮將往寧扳雲際之瓊枝不顧河洲之宿莽有韓娥者聞此辭乃抗音而奏陽春之歌歌曰魚漫濶兮鳥綿蠻逝白日兮銷朱顏蕩許春愁終不去解許春懷終不閑詎怨多而心死直歡飲而淚斑欲知妾恨復誰是皺盡雙娥不似

山

臨蘭皋賦

徐媛

縱目平川襍英纘紛晴巒染翠蒸霞吐氛於時夷猶徙
倚遐眺怡神鸞簫咽夜鼉鼓喧晨爾乃倚櫟俯流命酒
賡詩黃鳥翩翩白雲離離青萍軟葉碧柳綿絲遼西語
燕武昌遊魚璇閨春煖玉塞寒舒滯行子於天涯望征
人於絕域羈鷹決起牧馬肥澤煌煌羽蓋隐隐旌旛日
華飄彩素月流輝林散紅桃水芳綠蘿斯時也或驅寶

馬而徊翔或駕瓊輪以遊嬉或邀靈於洛汭或紱佩於
湘渭鳴雕鐘於睇澤沸廣樂於咸池集有名賢坐無俗
侶羣謳浪以抗高雲澹容與以遨川嶼桓伊之邃奏劉
伶之觴舉量溟渤以為酒衡泰岱以為鬱羅萬象於瞬
息和造物於天倪極娛樂兮迎上春列遊駟兮來下里
曳曳蕩輕衣珊珊揚雜珮望遙路兮驚春獨予情兮悲
涕有草兮萋萋有鳥兮差池徑苔兮蕭瑟庭花兮離披
已矣哉春光媚兮秋螢飛春華燦兮秋露晞滄桑詎可

定綺羅無復依聊抒情以寄恨結長風以東歸

夢遊春賦

袁尊尼

夫何青春之熙蕩兮欣予情以遨游指丹穴於城隅巍
樓鳳之高樓隱玳闌以朱箔疏洞戶以碧鏤晴露湛其
可攬暖氣晶而若浮爾其征驥乍停闔扉徐啓花豔豔
兮一人草青青兮千里字比英兮方新名取艾兮信美
吐鸚武之慧辭振翡翠之鮮羽瑤席紛其始設金尊絡
其遙行蕙肴蒸兮陸海之珍產絲吹作兮蓬闌之清聲

流盼昧於目擊狎笑語於心傾金母告予以好逑毛公
謂予以定情於時月方中夜將半辭歌侶謝酒伴寥璇
室之絳惟拂象床之羅薦既抱持而喜當亦逡巡而辭
賤極縕繙於茲宵重綢繆於申旦委微軀兮何言奉君
子兮靡厭若夫永晝安坐薄暮經門孟公之醒未解北
海之筵已醺日何日兮且快飲夕何夕兮復開尊則有
姬姜遞進秦虢偕臨婺湏映彩蕙蘭接芬坐間間而成
列情耽耽而各伸驟鵠絃兮激檀板理錦箏兮間綺琴

舞結風於陽阿謳白雲於西崑夕陽下兮秉燭漏水歇
兮逮晨終德將而靜好謝襄態於囂喧爾乃收滛霖濯
鮮景望別圃而氣新步曲徑而目騁綺羅灼爍兮分桃
李之韶顏金粉纊紛兮逐蜂蝶之飛影芍藥采采以贈
予謂此妍芳之當領促羽觴以勸酬紛盤餐之沓併隨
坐卧而各適恣諧謔之机穎藉綠草以為茵竟昏酣而
度暝又或開霽閣兮寫素臨晴窓兮題扇親拂几席獨
侍筆硯點飛墨於絳袂飄逸鬢於素面促曉粧而屢淹

佇依依而結戀投清言兮能叅延靜賞兮可念至若新
火迎候上巳屆期遵踏青之遺俗修祓禊之故儀度嚴
城以容與駕香車以逶迤雨花之高臺兮紅粧陟而獨
眺叢篁之給園兮翠竿傾而共紆曠臨風以舒寫追馳
景以旋歸排邃館而再入儼高晏之重披聊假息兮倦
思夜未央兮何其惟歡悰之蟬聯猝殫陳曰錯莫獲一
日兮足以極乎三春之娛况三月兮曾無間於一昔之
樂顧循省於踰朞徒覲慙於獲落游子經時兮不知其

淹久竚人即次兮靡覺其飄泊緬予生之何幸睠有美
之難忘結長思於知已韋遐想於衆芳鳳臺迥兮簫韻
悠秦淮森兮離歌動恍春光兮何在悵茲游之如夢

哀春賦 錢福

夫何鶗鳩之早鳴促繁英以俱萎雖群芳之共惜嗟國
色之猶奇緬惟梁園雪霽金谷暘悲阿房競艷步樟李
靡廻有解語之紫芍協律之黃離露桃妖冶錯高標於
澗竹海棠嬾娜噴餘香於江蘿梅萼妝漢宮之額龍蜒

幻襯女之姿羨飛燕於昭陽剪尾汎汎詠鴛鴦於周雅
翠羽差差東皇之興方濃青鳥之信將返枕展兮黃梁
飯塾衾寒兮羅浮月滿巫女雲銷宓妃珮緩望雨陽臺
翳烟霧而莫尋凌波羅襪埋泥沙而誰浣香不聞兮鸞
簫寂莫挽兮鳳輦王嬌去兮荒塚青田綠珠墮兮石樓
翠掩慨紅紫之皆湮悼西飛之勿綰意乍飄而忽綴誓
一逝兮忘轉於是遊人停轂主人覆桮山悽惋以色慘
水嗚咽而聲哀月荒涼兮舞榭草莽灌兮歌臺君山笛

歇弔娥皇之弗起廣陵琴亡悵王孫之不來時撫檻兮
予或觸故兮襄回決河方注迂石以阻燎原方熾回風
以灰諒無竇之可入豈有緣而匪媒啓重闕兮拾遺鈿
而永慕隧道九地兮誓同心之再諧亂曰珠沈玉殞玻瓈
遯兮蕙謝蘭枯麝齋燼兮怨歡娛之不終信佳人之薄
命妬芳妍而嫉寵亦造物者之深病錢布寰區棹卽不
免於飢終輦馳永巷驪冠竟坐乎短梓悲笳再贖馬嵬
一盡知巫咸之難招仗少君而通問縱餘芳之勝初絕

殊根而蒂並絲紫紫兮泥融看落紅之成全却寒帷以無語儂禪闋之入定試援筆以哀吟續白老之長恨

禊賦薛章憲

月朏明生風恬日熙修厥禊事聊張水嬉磇岸斗絕以噴沫長河迤邐而漣漪我酒既旨苾苾芬芬亦有嘉肴以炙以燔烹魚擊鮮魚鼈肺燔靈鼈逢逢威鳳翩翩螭頭掉而輕矯鷁羽旆而高騫鴛鴦在梁鳬鷺在亹童冠雲集僕夫雷奔艤楊柳之陂塍憩枳棘之墓門意行無

尚為樂無方爰除地以布席因流潦而汎觴乃歌乃舞
乃祓乃禳袒裼襟裾淋漓衣裳或撫掌以蹲踞或攘臂
而跳踉或偃仰其側或攖攘其旁酒力澁而陸沉兮類
投醪於洪波梧既舉而流澌兮類覆水於坳堂舉柳州
之故事率蘭亭之舊章杯疾如駛衆樂如狂靡三爵而
有節雖百觚而無荒既醉既飽言旋言歸匪依稀於卜
洛亦庶幾於洛沂豈湛樂之是從舍齊聖其疇依以永
今朝樂景物之容與未卜其夜恨林光之熹微已而返

棹亦既徹俎四簋更設六博再舉肴殼煮兮翠竹崩饋
餧炊兮赤梁桓歌鶴鳴之在陰咏鴻飛之遵渚清謳間
發荃橈斯弭日之夕矣瓶之罄矣三揖以上一筭而止

修禊賦

黃卿

維嘉月之昭淑兮慶昇平之豫休元已倏其依辰兮祓
濯躍其可修要草莽之莫逆兮恣談笑以綢繆有頎頎
不速以來兮荷衣蕙帶之紵紵霽雲拂其四沒兮條風
習習其燠柔言弭步於湄澳兮策扶老之刻鳩逢龐眉

之省田兮訢我行之焉求遡動樂之孔訓兮睠夷猶于
芳洲山近郭以導泉兮濶濶秩秩其長流雖未比於名
川兮清淺適以盥漱平曰順時以解禊兮除穢累于洋洋
曠襟宇以騁望兮揖相祝以吉祥石齒齒以立波兮
聊浮泛乎羽觴藉稜楊之為幄兮潔野肴之我將傾
醑之如鬯兮復罍繼之椒漿菽遠採以充案兮左右芼
之芹香有起觀于檻泉兮或聆別派之淙淙試一壺之
泳下兮漂絳棗之泱泱蒲葦弱水可級兮嗅杜若之微

芳荷吐波之如錢兮辨荃芷之萌芒羨油油如各有得
兮鑿俯仰之徜徉余久滯於塵堅兮載滌澗於滄浪振
衣咥而忻忻兮朗誦盤銘之章粵茲禊之源逖兮稽隨
波之逸詩謂秦昭之金人兮殆謫謫之兢竒若漆洧之
士女兮彼淫謠之可嗤洛水盛集之罔節兮瀉渭游觀
之荒嬉慨吾邦之過朴兮奚云飲祓之非懿猗曾晳之
超然兮偕童冠以浴沂眷來遊之擇良兮咸溫溫而不
比較張弛之中兮豈厭厭沉酣之為矧林澤之幽寂兮

遠鄼市之喧豗倉庚覲覲叢樾兮玄鳥翀其旋迴飄絮
風絲之曳曳兮鷺鷕汎洄以相隨於牧儻蝦之上下兮
萍藻翠迷乎隩隈善飛潛之油油兮逢漁獵而阻麌賓
辭觥以詠歸乎恐華胥之晡暝願覩貞之靡渝兮歲其
游以綏綏

明文海卷六

欽定四庫全書

明文海卷七

餘姚黃宗羲編

賦七

時令二

聽秋賦 桑悅

大化運行禪續無垠炎帝既斂少昊迺伸是名為秋萬物返真脫木之葉解草之節川瘦兮徒濂濂山凋兮孤呴呴惟為狀之荒涼宜出聲之淒切若乃嚴霜降白露

凝天籠薄陰地吐濕蒸布落寢之景象假物物而悲鳴
蟋蟀何怨而長夜訴征鴻何興而清晨吟慘莫慘兮風
飈落木之韻清莫清兮雨激芭蕉之音淡日銜山助以
懷舊之笛涼月墮水雜以寄遠之砧足以凋公子之朱
顏淒壯士之素襟而况薄宦淹璞中之玉遠賈盡床頭
之金鄉關忽縮而近念親故久疎而暗尋寧不逼霜華
而入鬢滴蘋汁以經心者乎僕本豪徒慷慨輕生流落
江湖汎梗飄萍歲聞茲聲亦悒予情既而嘆曰聲從外

來何由內驚豈內不足而爲外擾爰主吾敬爰鑰吾局
久而吾內澄澄吾秋冥冥聲從何來樞衣而聽毛骨爽
兮心胸明塵影滅兮夜氣清寂亂思之翫翫沉萬慮之
營營豈爲予情之美惡私喜収物之功成是知非秋景
之可悲兮人獨悲傷乎秋景非秋聲之難聽兮人自難
聽乎秋聲伊茲秋之爲酷轢賢達而獨忍又欲假名賢
之淒韻增萬世之孤憤故宋玉謂皇天平分四時兮竊
獨悲此凜秋潘安仁謂嗟秋日之可悲兮諒無愁而不

盡出茲聲之尤切潛雕肝而琢腎予方觀天道之肅殺
付悲秋于一哂悲夫天有四德元亨利貞人有四德仁
義禮智秋之為秋在天為利在人為義君子全德是名
不器于焉為文音備五音味備五味混同天人秋吾一
氣鳴吾文之商聲曾內外之足異夫然後知心源未和
伏以憂蒼雖春日載陽花明景麗聞鳥鳴之嚶嚶與童
冠之歌詠亦足以鬱悒而侘傺也

秋懷賦 屠應峻

陸大夫為儀制郎中積功飭行為天子所知而宰
臣議階出奉閨臬僕鄙人也撫時即事喟焉賦之于
時秋也因以秋懷命篇其詞曰

何秋氣之瘳疊兮倣素律之淒淒申鳴鶴使戒露兮萎
修蘭于枯丘叢林旖旎奄以夕勁兮游氛殞葉風揚埃
慄慄邑邑物錯迕而就罷兮寥落晃朗天高而日微
蟬中寂又續厲兮熠燿的的而宵燔玄鳥泝陰以辭宇兮
雁即陽而南征繄離離其羣諧兮予罔沕兮而懷友生

固秋士之易哀兮感物化之難憑送將歸返故都兮心
淹留而自閔子捐故而偶新兮予怦怦其若履淵不吾
知其奚怨兮竊悲夫今之人蹇余生之諒直兮弱好以
崇方豈惟紱蕙而佩芷兮固茹瓊而沫芳光陸離以周
襲兮中矯厲而慨慷指前修使先導兮驂騏驥而服飛
黃悼世俗之傾隘兮信多岐而亡羊黨機巧以捷步兮
競詭異而改則予將持頑刃而釋堅兮固巔巔而難入
眩羊腸與九坂兮方世路其猶夷棘剗剗于厥心兮誘

穿檻而寤歌勢軋軋而並轡兮刺白刃而仇之瞻峨峨
以蔽目兮還峨峨其愉之混淆濁而伐異兮寶偽而汰
真躬燃灰謂光於天兮指日月其不煒岱華坎其汚泥
兮尾間窪而溢山婦鬚而男則帽兮鵬一羽而巨焦明
宜虎翼而虺足兮雞牝晨而暗雄予雖要明月與懸黎
兮咄黯黯而宵黜黜額余增欷兮子揆予之惻惻固
鄰德而不孤兮信內美其必合車間闊有兩輪兮耕藉
藉且焉偶獲子信姱以倜儻兮又重之以修能協神人

使揆序兮帝爰褒之曰功彼登佞而抑良兮陳臬事
其以敷華采衣之粲粲兮武蹲蹲于冠弁夫孰命其匪
恩兮余竊疾夫衆女之善妬而誣淫嗟驕人信好好兮
奄乘高而斅度躬絕命猶弗逭兮澤賈讒而翼怒予謂
棟且隆隆兮羨撫穢而得路伊霖之效尤兮奚婪婪其
求索余將望闔闔撫神龍兮虎豹耽耽其碭突鐫鎗阿
那以抱日兮畱砰砰而存外夫哲后豈弗寤兮孰九死
其奚語彼粲春之蹇蹇兮迅隱軫而北南懷遭廻猶未

悔兮余觀夫裕之與安豈縷數其不可殫兮離多難而
浩嘆子欣欣其遠逝兮矯九仞而降觀朝策馬于燕都
兮夕次于魯之郊揖叔旦而質迓衡兮邈吐哺之上休
馳汶陽且弭節兮祇神宮而淹留庶穆穆其猶儼兮或
見聖而永由存靈光而噭渠渠兮喟佾舞胡以逾長太
息而升降兮迫南征之悠悠歷豐沛而壯漢兮陟歌風
之故臺唯從諫若轉圜兮遵后皇其弼諧閔作忠而賈
怨兮南浮江而吊鴟夷彼毛輶鳴以為惡兮矧黃鍾之

若雷躋會稽之薩崇兮就文命而歷茲既玄莫予聞
兮遙緘辭而徘徊躋武夷其隱天兮嶢崎嶇乎獨處廓
騁四望以忘憂兮遽懷余之連連伊仙鯉之忽恍兮具
靈精為予占之帝赫赫卑而諒衆兮命掌夢使報嘉曰
懋戢穀以自持兮孰險巇而弗崩苟執德之無爽兮般
修名之鵠鵠余服訓而絕俗兮阽危而不能舍也子玉
蘊以自珍兮庶來美而該輔也亂曰浮雲泱漭秋日曠
兮鳳翔于淵鮑魚御兮余溘與百草同死兮胡駕駘以

方騷兮余寧鎻鋤之利以棄兮胡同鈔刀在室兮心結
悵而莫從予兮荃易晰奚終懼兮

秋賦盧紳

楚襄王與宋玉游於雲夢之臺舍蘭臺之館浮漢沔略
江潭射揚林眺蒙山游旌蜿蟺法象緯爐輝蔭三湘氣
彌七澤猗蘭幽以承珮芳桂遠而延輶輦瑤華之纊紛
翔翠羽之翩翻於時涼月懸珪白露凝輝寒風鳴條微
霜沾衣宵霧靄兮遠山峩暮烟橫兮長河渭王迺抽牘

掄翰以命宋玉曰疇昔雲夢之遊子大夫為寡人賦高
唐未及蘭臺之駕子大夫為寡人賦雄風方今日馳虞淵
鶻先鳴汗漫淒淒無以攢情子大夫未有說乎願為
寡人賦之宋玉于是逡巡改容釋位離次跪而稱賦曰
臣聞天地無閼乾坤斥衍剛柔皆分時序交禪春華發
榮秋實振晏其為體也博確鴻固專翕廉凝收歛像類
參伍元英乾健不息弼成罔極上備天道下全王德秋
之時義大矣哉夫其朱明既退招拒斯昂蓐收弭蓋少

肆弛裝闢白門肅金方韜炎飈激清商焦溪涸而不流
沸潭潛而弗揚爾其為氣也氤氳膠戾溟翻頽墮翁翳
綸菌掣蹠磧霏喻翕忽忽撞搪磕礪若迺觸土囊汙汚
之口漱大木圈枅之竅嫖厲叱鳴廻戲突嘯眩勃碣駭
跔跋攢號倏拂改節和喝稍嘈崕兮若促絃柱而搞箏
纂迺兮若逸擠而鳴墳囂網緼窳圜橫酸鬱陶爾其為
容也澹淡曠曠皓曠曠斥堠涎漫廓落鴻敞荒裔凌
厲上下康寔黜靄轉薄游氛軼蕩紛熊態橫出蘊懷悵惘

蕭瑟寂寥恫恨憎懷孤臣孽子遷客棄婦莫不感心傷
氣流涕增欷爾其童濯嶮巘分披嵒岫疏離案衍宣回
敷壑泐岝崿嶧群山蕭索劉厲彌平寂寥空聊於是清
玄海落長江抑鳥澤熒扶桑潛漂渟潏涵靈鱗湧瀼霜凝
龍窟霰落鼉房鮫人泣珠海童滅光陽侯馮夷天吳個
像魂銷魄揚率悉愴悅若乃芟糜森蔚沈寥林塘隳葩
搭棟伐萌沙櫟繫精於松檜之林獵芳於桂椒之圃被
杜若委庭蘭蒙江離夷射千翠葉紫莖朱萼秀華隨風

振綺應日傾葩於是雁游江浦雀流海濱燕歸玄穴蟬
寂窮林蟋蟀宵征鶗雞夜吟陰凝氣潰萬物凋瘁倘有
藏身後時削跡未逮披零雹衝凍霰拆跂裂吻而死者
不可稱計若夫志士坎壈中人薄寒蹇產淹留感時增
歎惻愴迮節忿瞀溷恩僚慄於邑絃結弗變此夫閉藏
萬有撙節造化忌盛憂滿唯秋之謝王廼乘戎輶載素
旂服白玉駟雲螭居明堂命將帥誅暴慢明好惡嚴斷
刑修法制繕囹圄決訟獄感氣順化應時承治所以張

弛乎仁義之道彌縫乎禮樂之文於是東漸西被恩殫無垠修臂鑿齒之邦結胸驩頭之民幪鳳凰箱麒麟紮猛獸籠文禽薦上國充珍肆於昭聿皇萬萬歲

九日賦

俞允文

肇九旻之令節肅淒辰之始霜悴百卉於綠林歛萬實於白藏于時律中無射日躔在房山樞凝丹禽華吐黃感靈鍾于豐嶺收帝籍于神倉惟日月之並應數遘九而皆陽懿嘉名之宜久故高會而薦觴或助術于彭祖

或弭禍于長房或差實以效新或凜服以致康若乃駕
言龍山于茲飈館發戲馬之楚臺弋翔鴻于沙苑咸宴
凱而稱詩悉釣竒而摛掞至如紫塞草白蒼山氣高雲
物無擾上屬澄霄劖竿精堅弓勁鷹豪狐兔鮮肥人馬
並驕發千緝之赤羽勒萬騎之黑貂或翔畋于廣虛之
野或校獵于莽蒼之郊彌岡巒而掩格被川谷而橫梢
莫不致奇獲以耀武聊割鮮而騁豪及夫蘭閨少婦榆
關疲客結離思之幽遐念佳期之永隔睇來雁而增歎

學裁鴛而掩泣寒聲壯兮悽心脾夜被空兮月入室徒
有地兮限南北欲授服兮無由得愴無由兮思彌深鍼
縷列跡兮抽余心心之抽兮魂四溢魂四溢兮夢難集
雖有刀尺兮忘疇昔或有放臣去國感平分兮測景志
士思名薄迅商而孤騫慘憚兮迭遭淹留兮蹇連繁陰
積兮鬱素川雲督督兮蔽窮天悅踟蹰而延佇眇去楚
而辭燕于是僕本畸人棲遲丘樊于焉逍遙聊以盤桓
驚四序之改節悲倏忽之徂年想前蹤之攸邁覽窮遠

之異源超遐廻以暢志妙衆志而為言憂歡軋其相承
兮心與蹟猶未泯世固智寡而艱多兮孰云喻其萌祗
之所先齊萬族乃無累兮求周賈之冥荃庶憑化以無
忘兮還吾反乎自然

樂田賦孫宣

當秋期之既迨適夏緒之聿征晨颺作而漸厲時雨降
而已盈罷轆轤於渚際弛桔槔於漢陰田畯自喜其至
止農夫告予於西成整柴車而祇候命稚僕以相迎矜

畎疆之多沃幸醴醑之惟馨迺晨興而夙戒爰星駢而
露駛艤孤舟以迅發挈良朋以偕啓渡淼莽之平湖經
澄鮮之曲汜採菱荷以娛適叩舷舳以停弛望依微之
村落指迢遞之墟里舸沿岸以前達帆順風而遙艤載
行阡陌遂訊畛嶈闢繩樞之間靜坐茂樹之扶疎覽桑
榆之被畝盼禾稼之滿疇欣螟蟲之胥避慶螭蝗於畢
逋信實堅而實好良我翼而我與徵魯年之大有驗幽
風之匪誣於是督豎腰鎌課童荷笠領婦子以咸勤倩

僉僩而不集刈黃雲之彌漫走綠蕪之絡繹規場圃於
墳曠屏雞豚於隅隙戒滯穗而勿遺趁涼晨而維亟既
則引觴肆酌命酤高傳淹留町曲酩酊畦偏感成都之
多植慰杜曲之有田殊雒陽之貧薄類周邦之十千醉
何憂於得秫飽豈患於具饋時或跋履時曇輶策塍壠
乘輕颺之塏暢耽霽日之輝拱嘵老農以共談調黠佃
以相恐溷頑牧而譖浪禡拾秉而輞唪匙鑪殲而靡嫵
甌宜飲而隨捧躬芟割以自甘假胼胝以相踵廼有隣

叟暨彼里翁挈樽相遇饋榼來從排几席於梁茨息杖
屨於南東話桑麻之共裕詢今昔之幾豐校倉箱之多
寡述繇稅之從容緬傾壺而匪厭聊續筆而再同時乎
逝晷沉冥闌暉暝側雲黓靉而宵馳宿晶熒而夕列歸
巢林之群鳥揚攔戶之片月萃奮師而致送整角巾而
言別尋向舸之繫維泛前舟之超越景森颯而堪娛興
流連而未歇嗟予生之寡分際斯世之多艱始修辭於
楚激中投藝於燕閨將干霄而鳳舉竟偃翮而龍蟠從

遯栖之末計矢耕鑿之餘閒惟俯仰之無累斯嘯傲之
可安既以身為農父又何恧乎稼觀顧斗升之儉收藉
昊蒼之恒稔願霖霪之歲澍冀霪霖之時拯渠漬潤而
可溉陂浩蕩而堪引澤我黍之秀實充乃陳之庾廩念
鄙人之寡入俾竟保乎箕穎倘接禊而屢登約常游而
來省

金定正序

卷七



明文海卷七